

摘藻堂四庫全書薈要

經部

欽定四庫全書薈要卷二千三百九十一

經部

欽定周官義疏卷二十八

夏官司馬第四之一

惟王建國辨方正位體國經野設官分職以為民極乃
立夏官司馬使帥其屬而掌邦政以佐王平邦國

正義賈氏公彥曰鄭目錄云象夏所立之官夏整整齊
萬物天子立司馬掌邦政以正天下故曰統六師平
邦國鄭氏康成曰政正也所以正不正者也呂

氏祖謙曰自夏后氏命胤侯掌六師舉政典以誓衆則邦政之掌於司馬舊矣國事莫非政也獨戎事謂之政者寓兵於農編伍合聯賦役百為於是乎施是固政之所從出也天下有事則舉兵討亂邦之安危係焉政孰大於此哉曰平邦國者王師非以濟貪忿特欲平邦國之不平者耳劉氏彝曰邦治邦教邦禮之後次以邦政者舉兵討亂將使四海九州莫不循乎教治而安於禮樂也平謂戡定之

馬而酒誥云圻父薄違小雅仍稱圻父蓋文誥非命官之比故通用先代之稱

政官之屬大司馬卿一人小司馬中大夫二人軍司馬下大夫四人興司馬上士八人行司馬中士十有六人旅下士三十有二人府六人史十有六人胥三十有二人徒三百有二十人

行戶郎反

正義鄭氏康成曰興衆也行謂軍行列晉作六軍而

有三行取名於此

賈疏僖二十八年左傳晉侯作三行以禦狄注云晉置上中下三軍

今復增置三行避天子六軍之名
彼名軍為行取於行司馬之名也

黃氏度曰興司

馬掌車行司馬掌徒軍司馬兼掌之 易氏祓曰師

田之法險野徒為主易野車為主故各設司馬以專

其任 賈氏公彥曰史胥徒獨多於四官者軍事尚

嚴特須監察故也

案治教禮刑四官之司旅皆有官中常行之職業惟
兵則戢而時動雖百年不用不可一日不戒也故軍
司馬以下設興司馬以閑輿衛而教以磬控驟馳之

節設行司馬以整戎行而教之以步伐止齊之數使習之於平時而試之以蒐狩所謂本強而精神可以折衝也畿內之兵既更番而試之六服之國亦各用王朝之法以蒐乘簡卒則諸侯之師皆可以從王朝司馬之法所以六軍同力如臂指之相使也楚之強也卒乘戢睦日夜無懈隨會憂其難支晉之衰也公乘無人卒列無長叔向歎其不競觀此則知周公整軍經武之法雖百世不可易矣與司馬之爵高其任

重也行司馬之數倍其員多也六師之作每軍與司馬宜各一人行司馬各二人旅下士之居者行者亦各聽於二司馬而職文既逸無可稽矣大司馬掌軍政之大者其小治則軍司馬聽之唐時節鎮設行軍司馬祖此與司馬行司馬分掌車徒之事與天地春秋四官之上士中士通治官中之事者異故別立官名薛氏衡謂因事制名在官府則曰上士中士在軍旅則曰與司馬行司馬非也

凡制軍萬有二千五百人為軍王六軍大國三軍次國
二軍小國一軍軍將皆命卿二千有五百人為師師帥
皆中大夫五百人為旅旅帥皆下大夫百人為卒卒長
皆上士二十五人為兩兩司馬皆中士五人為伍伍皆
有長

將子匠反帥所
類反長知丈反

正義鄭氏康成曰軍師旅卒兩伍皆衆名也將帥長
司馬者其師吏也言軍將皆命卿則凡軍帥不特置
選於六官六鄉之吏自卿以下德任者使兼官焉

鄭氏衆曰王六軍大國三軍次國二軍小國一軍故

春秋傳曰成國不過半天子之軍

賈疏襄十
四年左傳

周為六

軍諸侯之大者三軍可也詩大雅常武曰整我六師

以修我戎大雅文王曰周王于邁六師及之此周為

六軍之見於經也春秋傳王使虢公命曲沃以一軍

為晉侯

賈疏莊十
六年左傳

此小國一軍之見於傳也百人為

卒二十五人為兩故春秋傳曰廣有一卒卒偏之兩

賈疏宣十

二年左傳

王氏應電曰六軍蓋通王畿千里更調

而用之觀四時教閱之旗物號名必兼州里縣鄙都
家可見矣三軍二軍一軍可以類推

案地官比長下士而伍長不言下士何也平時掌五
家之治必校行能而賜爵焉軍旅專取壯勇伍長未
必即比長之為士者又自六鄉以外五家之長本非
士也

通論左傳子罕曰天生五材民並用之廢一不可誰
能去兵兵之設久矣所以威不軌而昭文德也聖人

以興亂人以廢廢興存亡昏明之術皆兵之由也

薛氏曰一封出車千乘以杜氏法積算十同千乘當有戎馬四千匹牛一萬二千頭甲士三千人步卒七萬二千人合士卒之數可以為六軍曰大國三軍者猶天子六鄉六遂迭用之耳蓋諸侯地不過百里車不過千乘以開方之法計之方十里者為方一里者百其賦十乘方百里者為方一里者萬其賦千乘然賦雖出千乘而兵不過三軍五百乘而已則五百乘

三鄉之所出也千乘闔境之所出也何則鄉萬二千

五百家合三鄉則三萬七千五百家凡起徒役無過

家一人則三軍為三萬七千五百人矣三軍而車五

百乘則天子六軍為車千乘矣

案車乘之數此為核王畿千里為方百里

者百常具十萬乘之數六軍之作不過千乘臨時調發僅百分之一耳然則千乘之國其地必不止於百

里可推矣

王氏應麟曰古者什伍之法於州鄉則聯其

民於師田則聯其徒於宿衛則聯其官故能以中國

為一人而無內患為屬連卒州以聯其國為長師正

伯以聯其人故能以天下為一家而無外虞

存疑鄭氏康成曰伍一比兩一閭卒一旅旅一黨師
一州軍一鄉家所出一人 賈氏公彥曰云命卿及
中下大夫上中士者據在鄉為鄉大夫州長黨正族
師閭胥時尊卑命數也伍長是比長下士不言皆下
士者文畧

案制軍為大司馬專職小司徒以井牧之法徵賦於
鄉遂都鄙公邑大司徒會萬民之卒伍以起軍旅大

軍旅以旗致萬民州長帥而致之遂人師田作野民
帥而至縣師受司馬之法以作衆庶稍人帥而以至
以聽於司馬車徒既集然後大司馬更加蒐乘以制
為六軍不但軍師卒旅必以通融簡稽而成即將帥
司長亦須選任程材而授蓋前此更番弛舍均役徵
發之制具在地官而臨時大簡車徒陳鞠師旅比較
材武俾勇者各適其用强者不絀其材孰可前茅孰
宜後勁或以人為主或以車為主或攻宜用衆或守

宜用寡一切戎行節制戰陳機宜凡六軍之將所承
令者備具於司馬制軍之法但未必如後世田穰苴
輩所撰耳又況制軍之數不同於出甲之數徒之卒
伍不同於車之卒伍蓋參伍錯綜相為經緯彼此聯
事而實不相侵官大國以下制軍之法視此舊說泥
於六鄉出六軍之法遂以司馬司徒比而同之則此
經為贅矣王氏應電能見大意

說已
見前

一軍則二府六史胥十人徒百人

正義賈氏公彥曰有軍則置之無則已故不言府二人史六人而逆言其數以見義

司勲上士二人下士四人府二人史四人胥二人徒二

十人

注故書勲作勳
鄭司農讀為勳

正義鄭氏衆曰勲功也此官主功賞故曰掌六鄉賞地之法以等其功 賈氏公彥曰軍以賞為先故首司勲

案官中大夫士而外首列司勲非信賞必罰不可以

用師而民之死生聽於將覆軍之法重則有功者之
賞不可以不先也王功國功民功事功治功五者並
列職於司馬之屬何也王功國功之體大征伐雖包
其中而不足特舉也民功事功治功既成則本強而
內外順治有不戰戰必克矣所謂善為國者不師也
賞功之典非治教禮刑之所及故惟列於政官為宜
馬質中士二人府一人史二人賈四人徒八人

賈質如字
鄭音

賈一音古羊
人巫馬同

正義鄭氏康成曰質平也主買馬平其大小之賈直
賈氏公彥曰不與校人相近而在此者平馬大小
賈直故與量人相近薛氏衡曰地官歲時稽鄉遂
都鄙之牛馬辨其可任者馬之在民者無不足之慮
矣而公馬之缺則官買之故設馬質馬質宜為校人
之屬今列此者校人兼掌六馬而戎馬之用尤多其
事尤急先儒謂序官先後不以尊卑直取事急者居
前事緩者居後是也

量人下士二人府一人史四人徒八人

量音亮
或音良

正義鄭氏康成曰量猶度也謂以丈尺度地 賈氏

公彥曰以其掌營軍之壘舍量其市朝州涂軍社之
所里其間雖有餘事要以軍事為重故列職於此
小子下士二人史一人徒八人

正義鄭氏康成曰小子主祭祀之小事 賈氏公彥

曰以其職有釁軍器及師田斬牲徇陳之事故在此
王氏應電曰羊人掌羊牲但主宰殺耳其解折肉

豆皆小子掌之及夫用羊以為祈珥釁狗陳皆非羊人所與故設官在羊人之前且兼贊司馬之羞有司之徹皆小事也故以小子名官

羊人下士二人史一人賈二人徒八人

賈音價

正義賈氏公彥曰羊屬南方火司馬火官故在此

五行傳視之不明則有羊禍注羊畜之遠視者屬視故列夏官

通論薛氏衡曰大司馬職曰斬牲以左右狗陳曰不

用命者斬之小子職亦曰凡師田斬牲以左右徇陳
蓋誓羣吏者司馬斬牲者小子其其牲者羊人也故
羊人次小子

司燿下士二人徒六人

燿古煥反注故書燿為燿杜
子春云當為燿書亦或為燿

正義杜氏子春曰燿為私火

賈疏民間理爨
之火為私火

賈氏

公彥曰其職掌行火之政令火屬南方故在此

存疑鄭氏康成曰燿讀如予若觀火之觀今燕俗名

湯熱為觀則燿火謂熱火與

賈疏熱火對司烜氏以
夫燧取火於日為冷火

也司烜取金
義故在秋官

掌固上士二人下士八人府二人史四人胥四人徒四十人

正義鄭氏康成曰固國所依阻者也國曰固野曰險

易曰王公設險以守其國

賈疏掌固職掌修城郭溝池樹渠之固竝據國而言

司險職周知山林川澤之阻而達其道路皆據在野而言易於國亦曰險者對文則險固異散文則通

通論張氏拭曰孟子謂域民不以封疆之界固國不以山谿之險而掌固司險之職列於周官者蓋先王

之治體用兼備本末具舉有以一天下之心即有以周天下之慮所以常久而安固孟子之言則以當時皆重末而忘其本耳

司險中士二人下士四人史二人徒四十人

正義郝氏敬曰險謂四方阨塞要害之地所當防據者

掌疆中士八人史四人胥十有六人徒百有六十人

正義鄭氏康成曰疆界也 易氏祓曰王畿所屆謂

之疆載師以大都之田任疆地是也邦國都鄙亦各有疆大司徒制其畿疆而溝封之是也此官雖逸以司險推之則掌王畿以及邦國都鄙之疆審矣王氏應電曰主王畿千里四面封疆之境地廣而遠故官吏視掌固司險獨多其士以八人者蓋四正四隅也

案疆界所以正封守禁侵奪王政之大也先王知後世疆衆相凌必自紊其疆界始故設官掌之至春秋

時大國兼地數圻則王政不綱掌疆之職不修也

候人上士六人下士十有六人史六人徒百有二十人
正義賈氏公彥曰其職云各掌其方之道治與其禁
令以設候人詩云彼候人兮荷戈與殳亦是武事故
在此

案候人本主境上候望而有方治來者亦帥之送之
若大賓客則自有掌訝與訝士迎送非候人之職矣
注以為候迎賓客之官蓋未通會秋官也周語云敵

國賓至候人為導侯國不備官或以候人兼掌訝之職與

環人下士六人史二人徒十有二人

環戶
關反

正義賈氏公彥曰其職掌致師察軍慝皆是軍事故在此黃氏度曰以環名官取巡邏周匝之義

通論鄭氏鍔曰夏官環人掌巡察軍中之事秋官環人掌送逆邦國之通賓客皆循環往來為義

挈壺氏下士六人史二人徒十有二人

挈苦
結反

正義鄭氏康成曰挈讀如絜髮之絜

賈疏詩總角之髮毛傳總角結

髮也此注依毛傳絜即結之義

壺盛水器也世主挈壺水以為漏

賈疏

以其稱氏故知世官

賈氏公彥曰案其職所列皆軍事故在

此 郝氏敬曰大軍所止遇水可汲懸壺示衆故名

案挈壺氏隸夏官軍行必載行漏也

射人下大夫二人上士四人下士八人府二人史四人
胥二人徒二十人

正義賈氏公彥曰射武事故在此 薛氏衡曰先王

於祭祀則有射於燕饗則有射文事而兼武守重其職故以下大夫為之長

服不氏下士一人徒四人

正義鄭氏康成曰服不服不服之獸者

賈疏象王者伐叛服柔之

義

黃氏度曰射人與司士諸子聯職而以服不氏以下四官參其間服不氏待獲射鳥氏取矢終射義也

案四官皆各養一牲而羊人馬質並設於夏官復列

服不射鳥羅氏掌畜四職何也四官事紛惟兵則不
得已而後用官中事簡而國事所用馬與羊最多羅
氏所掌羽物實繁掌畜所養事類雜冗故並設於夏
官射鳥氏則因射而及之又所射乃鳥中膳羞者與
羅氏掌畜為類故別之於庭氏之射夫鳥設官分職
之宜講事處物之當即此可見論官職則射人之
下當次以司士諸子以服不氏同有事於射故與射
鳥氏四官並附焉

射鳥氏下士一人徒四人

射常亦反

正義賈氏公彥曰射鳥亦武事故在此

羅氏下士一人徒八人

正義鄭氏康成曰能以羅罔搏鳥者郊特牲大羅氏

天子之掌鳥獸者

賈疏案郊特牲大羅氏天子之掌鳥獸者也諸侯貢屬焉彼稱大對

諸侯此無所對故不稱大此職惟羅鳥彼兼言獸則兼掌之也

案服不氏贊張侯射鳥氏兼為射人取矢故次射人

羅氏掌羅鳥而繼之者從其類也

掌畜下士二人史二人胥二人徒二十人

畜許六反
劉許又反

正義鄭氏康成曰畜謂斂而養之

賈疏案其職云掌養鳥而阜蕃教擾

之是專養鳥注謂鷩鷩之屬是斂而養之

司士下大夫二人中士六人下士十有二人府二人史四人胥四人徒四十人

正義賈氏公彥曰其職掌詔爵詔祿贊大司馬進賢興功故列職於此 郝氏敬曰案王制大司馬論造士升之司馬司馬論進士之賢者告於王而官之故

司士為司馬之屬

案司士隸夏官以司馬論辨官材習察其人然後用之各當也射人掌公孤卿大夫司士掌士士員多故司士與射人爵同而中士下士之數又多也

諸子下大夫二人中士四人府二人史二人胥二人徒二十人

正義鄭氏康成曰諸子主公卿大夫士之子者或曰庶子李氏嘉會曰在此者與司士等皆是辨論官

材之事

案入成均者必適子其餘皆掌於諸子故其職曰掌國子之倅

司右上士二人下士四人府四人史四人胥八人徒八十人

正義鄭氏康成曰右謂有勇力之士充王車右

賈疏其職

云國之勇力之士能用五兵者屬焉

賈氏公彥曰在王車之右執干

戈以衛王故在此 劉氏敞曰司右屬車之右也若

王王路金路之右則下大夫也象路之右上士也戎路木路之右中大夫也故羣屬車之右別立司右以掌之

虎賁氏下大夫二人中士十有二人府二人史八人胥八十人虎士八百人

賁音奔

正義鄭氏康成曰不言徒曰虎士則虎士徒之選有

勇力者

賈疏胥下例皆是徒今虎士在胥下故知選徒之有勇力者言賁見其勇

案虎賁氏不言徒而曰虎士蓋勇而有志行者

通論呂氏祖謙曰周公戒成王以虎賁與任人牧人
準人並言蓋侍衛僕御朝夕親比必得正人漸移默
化故慎虎賁綴衣之選乃養成君德詳密處

旅賁氏中士二人下士十有六人史二人徒八人

正義賈氏公彥曰言旅見其衆

案旅賁氏掌執戈盾夾王車而趨其地尤近職尤親
故皆以命士為之且世職焉蓋必材武過人忠義素
厲而後得與此選後世逆亂多由禁旅使宿衛皆世

臣良士姦兇豈能相煽哉 虎賁氏掌先後王而趨以卒伍其趨者虎士也徒之強力者也虎賁之外更設旅賁夾王車而趨乃任官之士強力而篤於忠義者故夾王車之左右視先後者尤親且近矣

節服氏下士八人徒四人

正義鄭氏康成曰世為王節所衣服

案春官司服辨用事以共其物而已故特設此職使常侍左右凡王登車下車易服弛服之節及風雨寒

溫皆在視而得其宜所以謹儀法而王躬是保也司服惟辨禮度其事簡故設官止二人此職朝夕無間必八人乃可以更番遞代其不以類從司服而屬夏官以與諸僕聯事凡王有行無不從也

方相氏狂夫四人

相恣亮反注音放想不必從

正義王氏應電曰其職主執兵以逐疫亦用武以正其不正之事故屬夏官

存疑鄭氏康成曰方相猶言放想可畏怖之貌

賈疏放想

漢時有此語是
可畏怖之貌

大僕下大夫二人小臣上士四人祭僕中士六人御僕
下士十有二人府二人史四人胥二人徒二十人

正義鄭氏康成曰僕侍御於尊者之名大僕其長也
賈氏公彥曰四官別職同官故共府史胥徒王

氏應電曰大僕掌正王之服位詔法儀出入王之大
命故稱大小臣掌小命及小法儀故稱小禮莫重於
祭故特設一官以掌其事燕居必有侍御之臣其事

繁故御僕十有二人

通論鄭氏鏐曰小臣爵上士蓋以德行道藝簡者天
官內小臣掌王后之命亦以奄上士為之

隸僕下士二人府二人史二人胥四人徒四十人

正義鄭氏康成曰此吏而曰隸以其事褻 賈氏公
彥曰所掌事褻故別官不屬大僕 何氏喬新曰隸
僕主五寢之潔除非徒四十人則不給於用

案凡國中之勞辱事皆罪隸共之五寢之埽除糞洒

不可使盜賊之子故以徒代隸而因以隸名官謂此僕所掌者隸事也疏謂與賤者同稱則司隸中亦有下士何獨於隸僕則為賤稱乎

弁師下士二人工四人史二人徒四人

弁皮
彥反

正義鄭氏康成曰弁者古冠之大稱

賈疏禮記郊特牲及士冠記皆

云夏收殷呼周弁皆祭冠也則冕亦得稱弁故云古冠之大稱

委貌緇布曰冠

賈疏此二

者惟對皮弁爵弁六冕則曰冠若散文亦得稱弁故司服職凡田冠弁服凶事服弁服

王氏

應電曰弁首服之次於冕者自天子而下皆用之冕

則不常服故冕雖尊而獨以弁稱

司甲下大夫二人中士八人府四人史八人胥八人徒八十人

正義鄭氏康成曰甲今之鎧也

賈疏古用皮謂之甲今用金謂之鎧

司

甲兵戈盾官之長

通論王氏曰周官先司甲而後司兵費氏先言敕乃甲冑敵乃干而後言備乃弓矢鍛乃戈矛礪乃鋒刃者戎事先自保也

案甲之成也難收藏亦不易故官中之士及府史胥徒視司兵司戈盾以倍也

司兵中士四人府二人史四人胥二人徒二十人

正義賈氏公彥曰其職云掌五兵五盾及授兵從司馬之法故在此

司戈盾下士二人府一人史二人徒四人

盾豎尹反

正義鄭氏康成曰戈今時句子戟

賈疏案考工記冶氏為戈戟戈則兩

刃長六尺六寸戟則三刃長丈六尺此注云戈句子戟為一物解之者蓋舉漢法況之漢時戈有旁出者

為句予亦名胡子故
號戈為句予戟也

案五兵五盾既有司兵以掌之而又設司戈盾之職
何也司兵事繁大小輿帥及甲士之五兵皆以司馬
之法頒焉故王之侍衛別使司戈盾授之府史皆半
於司兵其事簡也無胥而徒亦少以士大夫之戈盾
皆親授之無所用胥徒也若甲士則涖焉而使胥徒
授之可矣故司兵有胥而徒特多

司弓矢天下大夫二人中士八人府四人史八人胥八人

徒八十人

正義鄭氏康成曰司弓矢弓弩矢箛官之長

賈疏繕人橐人

皆士官故得與之為長

郝氏敬曰弓矢之用要而廣故設官

同於司甲

繕人上士二人下士四人府一人史二人胥二人徒二十人

正義鄭氏康成曰繕之言勁也善也

賈疏以其所掌弓弩有堅勁而

善堪為王用者乃入繕人

鄭氏鏐曰左傳大叔繕甲兵言修治

之也

橐人中士四人府二人史四人胥二人徒二十人

橐 古老反

正義鄭氏衆曰箭幹謂之橐

賈疏案矢人記以其筈厚為之羽深後鄭注筈

讀為橐
謂矢幹

賈氏公彥曰案橐人非直掌矢橐兼主弓

弩矢箠等而云橐人者以橐為主耳

案司兵司戈盾惟辨其物以頒之而弓矢則別設繕人橐人何也五兵之用少弓矢之用多王親征誓師則杖鉞秉旄在車則執路鼓五兵不親執也射則王

時有事弓矢決拾諸具不可以不加之謹故設繕人掌王所用以詔王而贊其事焉橐人專司弓弩矢箠諸財用之出入亦以物博事繁非司弓矢一官所能兼理故增設橐人總其工作并董率而勸懲之所以工皆競勸而用無不利也

戎右中大夫二人上士二人

正義鄭氏康成曰右者參乘

賈疏若元帥之車則將在中居鼓下御者在左

凡兵車則射者左御者居中若在國則尊者左御者亦中央其右皆勇力之士執干戈常在右故云右

者參此克戎路之右田獵亦為之右焉

賈疏案中車王路有五下

文僕亦有五此戎右已下不見王路木路之右以田戎相類齊祀相因故戎右兼田右齊右兼祀右僕不

兼者僕難於右也

通論賈氏公彥曰案中車王路居前戎路在後今戎

右在前又戎右中大夫齊右下大夫道右上士者夏

官主兵事尚威武故戎右居前而官尊也薛氏衡

曰右與僕皆身任其事故無府史胥徒

齊右下大夫二人

齊側皆反

正義鄭氏康成曰克玉路金路之右 王氏安石曰
金路以賓而謂之齊者敬賓如祭也

道右士二人

正義鄭氏康成曰克象路之右

賈疏以巾車五路差之上已有玉路金革

之等則道右當克象路之右

賈氏公彥曰上四事簡故使兼道

右每日視朝行事繁故不兼以其事次於齊戎故官
秩卑也

案戎右以中大夫齊右以下大夫道右以士者右取

其武故戎右宜尊賓祭尚嚴故次之朝夕視朝武非所尚也右以戎兼田以祀兼賓而僕各異者右主捍衛其事可兼賓祀師田車行異節必各有專僕而後事可閑也

大馭中大夫二人

正義鄭氏康成曰馭之最尊

賈疏以其御玉路以祀故云最尊不與下同名

僕而謂之大馭

王氏應電曰馭者通謂之僕惟大馭不稱

僕者以前有大僕不可混也

通論王氏志長曰戎車之馭與大馭同為中大夫者重戎也不得同稱馭者尤重祀也

戎僕中大夫二人

正義鄭氏康成曰馭言僕者此亦侍御於車

賈疏大僕已下

並是侍御之官此馭車之人稱僕亦是侍御之類也

通論黃氏度曰射人令有爵者乘王之倅車戎僕掌王倅車之政即車僕所掌闕車廣車革車輕車之萃也 王氏應電曰五路唯戎車專尚威武此戎右所

以先齊右也車莫尊於玉路故大馭為長其次莫急於戎路故戎僕次之

案大僕下大夫戎僕則中大夫何也大僕平時朝夕王所以謹儀法其在軍惟贊王鼓而不共御事蓋王親即戎乘危歷險馬或駭輿咎莫大焉必久更戎事智畧過人不惟進退驟馳保無傾覆且艱難倉卒可輔王以發大命然後能勝其任故慎簡六官之貳衆職之長以克之而不取之於羣僕也戎右以中大夫

其義畧同

春秋傳凡軍事御右與主將並書以但中三軍之耳自咸屬於主將之車故也

大夫二人之外復設上士二人蓋戎田兼事上士乃

田車之右耳

齊僕下大夫二人

齊側皆反

正義鄭氏康成曰古者王將朝覲會同必齊所以敬

宗廟及神明

賈疏案朝覲受於廟是敬宗廟會同時設方明於壇上設玉以禮方明之神是

敬神明

道僕上士十有二人

正義鄭氏康成曰王朝朝莫夕主御王以與諸臣行

先王之道

案書罔命以旦夕承弼厥辟出入起居罔有不欽乃僕人之職而道僕以旦夕燕出

入與王尤暱近隨事當以道正王故注云然

賈氏公彥曰道僕朝夕在

朝往來駕脫事繁故人數多

王氏志長曰以更代也

田僕上士十有二人

正義賈氏公彥曰人亦多者王有四時之田兼有園
囿遊獵及取鮮獸之事故也

案田僕數多以王田道車旂車並從也

馭夫中士二十人下士四十人

正義賈氏公彥曰案校人良馬三十六匹一馭夫計良馬二千一百六十匹則六十馭夫駕馬一馭夫主四百三十二匹駕馬千二百九十六匹則馭夫三人并前六十三人與此不合者蓋此序官脫三人也

校人中大夫二人上士四人下士十有六人府四人史八人胥八人徒八十人

校戶
教反

正義鄭氏康成曰校之為言校也主馬者必仍校視

之校人馬官之長

通論薛氏衡曰周制軍賦出於丘甸馬牛車輦有地
治者歲時數之校人頒馬非頒於民乃頒之卿大夫
之從軍者也

趣馬下士皐一人徒四人

趣七口反劉清
須反皐才早反

正義鄭氏康成曰趣馬趣養馬者也鄭司農云詩蹶
惟趣馬

案校人職三乘為皐皐十二匹也

通論雜說曰趣馬虎賁綴衣皆賤有司也而詩書乃與師氏等並稱何也人主之治非廟堂聽決之為難而深居燕坐之為患非公卿大夫夾輔之為難而侍從僕御順適其意為可慮也君心惟閒暇為易縱臣言惟卑褻為易入於易縱之時而擇易入之臣朝夕於其間則可以養成君德矣

巫馬下士二人醫四人府一人史二人賈二人徒二十

人
賈音
價

正義鄭氏康成曰巫馬知馬祖先牧馬社馬步之神者馬疾若有犯馬則知之是以使與醫同職 賈氏公彥曰巫知馬祟醫知馬病有賈者治馬死生須知馬價也

牧師下士四人胥四人徒四十人

正義鄭氏康成曰主牧放馬而養之

通論鄭氏鍔曰地官有牧人則馬亦在所牧此又有牧師者馬之為牲者牧人牧馬餘皆牧師所掌

廋人下士閑二人史二人徒二十人

廋所求反

存疑鄭氏康成曰廋之言數鄭氏鍔曰廋為隱藏之義馬在閑中取其隱藏也故名曰廋人

案聘禮記盼肉及廋車廋即此廋人也

圉師乘一人徒二人圉人良馬匹一人駑馬麗一人

圉疑

呂反乘繩證反駑音奴麗郎計反

正義鄭氏康成曰養馬曰圉四馬為乘良善也麗耦也王氏昭禹曰以教圉人養馬故名圉師

案校人職自圉人以上圉師趣馬馭夫並分良駕之數而序官不載何也經文已明特於圉人所分揭其數而其上可放而準矣

職方氏中大夫四人下大夫八人中士十有六人府四人史十有六人胥十有六人徒百有六十人

正義鄭氏康成曰職主也主四方之職貢者職方氏主四方官之長賈氏公彥曰司馬主九畿職方制其貢事相成故在此官尊而人多以主天下人民貢

賦之事繁

土方氏上士五人下士十人府二人史五人胥五人徒五十人

正義鄭氏康成曰土方氏主四方邦國之土地

案土方氏形方氏及山師川師邈師所役皆司徒之事而以屬司馬者示有不稟職方之度而侵敗王畧者則九伐隨之 大司徒以土圭土其地而制其域 正此職所掌

存疑王氏應電曰設官之例凡士之數必以二四六八而此獨以五與十者以主五方也

懷方氏中士八人府四人史四人胥四人徒四十人
正義鄭氏康成曰懷來也主來四方之民及其物
合方氏中士八人府四人史四人胥四人徒四十人
正義鄭氏康成曰合方氏主合同四方之事

訓方氏中士四人府四人史四人胥四人徒四十人
正義鄭氏康成曰訓道也主教道四方之民

形方氏中士四人府四人史四人胥四人徒四十人

正義鄭氏康成曰形方氏主制四方邦國之形體

山師中士二人下士四人府二人史四人胥四人徒四十人

正義賈氏公彥曰案王制名山大澤不以封故天子立山師以遙掌之使貢故與職方連類在此

川師中士二人下士四人府二人史四人胥四人徒四十人

正義賈氏公彥曰其職與山師同

邈師中士四人下士八人府四人史八人胥八人徒八

十人

邈音原

正義鄭氏康成曰邈地之廣平者 李氏嘉會曰知

土宜之美惡種植之善否以教導民故曰師

案五等之國及附庸外八州皆有閒田諸侯削地則

歸於閒田故特設邈師以掌之 地官虞衡所主畿

內之山川也夏官山川邈師所主九州之山川原野

也遼師官府胥徒獨倍者平原較山林川澤為多也
匡人中士四人史四人徒八人

正義鄭氏康成曰匡正也主正諸侯以法則

擲人中士四人史四人徒八人

擲與探同
他南反

正義鄭氏康成曰擲人主擲序王意以語天下

賈疏
其職

云掌誦王志道國之政事以巡天下之
邦國而語之故云擲序王意以語天下

通論李氏觀曰天下之情欲上達故訓方氏之職設
人主之志欲下通故擲人之職設古者君民一體上

下交孚而無壅遏之患如此

總論薛氏衡曰職方之屬自合方至邊師乃建邦敷教安民懷遠之節目也究其本原則必有以大服天下之心然後政教四達而不悖故匡人達法則以遏諸侯作慝之私擲人誦王志以動萬民內向之志使諸侯咸知有王其國民共知有大君則九伐之法可懸而不用矣

都司馬每都上士二人中士四人下士八人府二人史

八人胥八人徒八十人

正義鄭氏康成曰都王子弟所封及三公采地也司馬主其軍賦 賈氏公彥曰此王自以臣為司馬遙掌都內故其職云掌都之士庶子及其衆庶車馬兵甲之戒令聽於國司馬

家司馬各使其臣以正于公司馬

正義鄭氏康成曰家卿大夫采地正猶聽也公司馬國司馬也

案或疑此當為家司馬職之文都司馬職後家司馬亦如之當繫於此非也家地甚狹大夫不具官安能設上中下士府史胥徒一同於都司馬乎

欽定周官義疏卷二十八

欽定四庫全書

覆校官庶吉士臣茅元銘

校對官檢討臣龔大萬

謄錄監生臣胡金石

謄錄監生臣鄧肇槐

欽定四庫全書薈要

經部

欽定周官義疏卷二十九

詳校官編修臣程嘉謨



欽定四庫全書薈要卷二千三百九十二

經部

欽定周官義疏卷二十九

夏官司馬第四之一

馬之職掌建邦國之九灋以佐王平邦國

正義鄭氏康成曰平成也正也 賈氏公彥曰九灋

以下皆言邦國以施於諸侯爲主 孫氏曰司馬統

六師則九伐之灋莫先焉而先言建邦國之九灋者

九灋脩明諸侯無侵敗王略者奚以九伐爲哉九伐

特不得已而用之

案大宰建六典司徒建土地之圖宗伯建三禮司寇建三典皆曰邦獨九灋之建曰邦國者四官所建皆王邦之典而侯國兼用之九灋則專爲侯國設也

制畿封國以正邦國

畿音祈

正義鄭氏康成曰封謂立封於疆爲界

案邦國有違言多由邊境鄰接經界水道之爭或中間隙地彼此皆欲得之

如春秋傳弼作等六邑宋鄭盟而不有之類

故制

畿封國時必使疆界分明不相淆混乃所以絕其爭
奪之源司馬之屬特設彤方氏掌制邦國之地域正
其封疆無有華離之地蓋爲此也八州之內皆有閒
田屬於王官諸侯之削地歸於閒田其加地進律則
以王命取於閒田以與之皆所以息爭端定衆志故
曰以正邦國

設儀辨位以等邦國

正義鄭氏康成曰儀謂諸侯及諸臣之儀

賈疏大行人以九儀

辨諸侯之命等諸臣之爵謂命者五公侯伯子男也爵者四諸侯之孤卿大夫士也若大宗伯以九儀之命正邦國之位則辨別也別尊卑之位兼有王臣與此異

案設儀辨位本大宗伯主之大行人辨之小行人協之司儀詔之又列於九瀆之中而大司馬並掌馬合諸侯之六耦則以屬大司馬蓋禮法者兵刑之本也進賢興功以作邦國

正義鄭氏康成曰興猶舉也作起也起其勸善樂業之心使不惰廢王氏曰進賢興功若王制所謂有

功德於民者加地進律 鄭氏鐸曰見於德行之謂
賢見於事業之謂功賢可尊也受七命者進爲八命
之牧受八命者進爲九命之伯功可錄也或加之以
地或進之以律進其賢者則不賢者自勵興其功者
則無功者知奮故曰以作邦國

建牧立監以維邦國

監古
銜反

正義鄭氏康成曰維猶連結也 賈氏公彥曰此即
大宰職所謂建其牧立其監上下相維持故云以維

邦國 林氏椅曰監乃屬長連帥之比

案此與大宰職建其牧立其監一也凡始封國大司馬與大宰共定之牧即所封之五等守土以牧民者監謂方伯連帥相監臨者方建牧而即立之監見其於方伯連帥必有所隸也左傳曰五侯九伯汝實征之

制軍詰禁以糾邦國

詰去
告反

正義鄭氏康成曰詰猶窮治也糾猶正也 賈氏公

彥曰制軍上文大國三軍次國二軍小國一軍是也
鄭氏鐸曰禁如葵丘五禁之類

施貢分職以任邦國

正義賈氏公彥曰施貢多少據國地大小宰以九
貢致邦國之用小行人令春入貢是也 鄭氏康成
曰任猶事也事以其力之所堪 王氏應電曰職方
氏制其貢各以其所有制其職各以其所能

案分職謂王巡狩征伐小大之國各有所承之職事

春秋傳所謂各脩舊職如衛取於有閭之土以共王職是也

簡稽鄉民以用邦國

鄉陸許亮反
今讀如字

正義鄭氏康成曰簡謂比數之稽猶計也

賈疏謂比
數計會鄉

民而
用之

王氏昭禹曰大國三鄉次國二鄉小國一鄉

簡其彊弱稽其衆寡然後衆可用

案用謂用以征伐田役也大宗伯之軍禮五此兼其
三大封則定於制畿封國之初大均則寓於施貢分

職之內蓋平常無事恤其財力以厚其生然後一旦用之皆知戮力於王事也獨言鄉民者六遂都鄙無不更番調發而要以鄉爲準也

均守平則以安邦國

正義鄭氏康成曰則法也 王氏昭禹曰匡人達法則以匡邦國平則者平其八則也

案均守平則所以正邦國之都家也

八則以治都鄙
管仲曰有天子

之二守國高在樂盈曰陪
臣盈得罪於王之守臣

三鄉二鄉一鄉所守地邑

多寡各有定分是之謂均爵有尊卑而八則無同異是之謂平守均而則平則上下和睦而國無不安矣

比小事大以和邦國

比毗至反

正義鄭氏康成曰比猶親也使大國親小國小國事

大國相合和也

賈疏如司儀五等諸侯相爲賓又諸侯之臣相爲國客皆是也易比

象曰先王以建萬國親諸侯

案九法之中大司馬專之者制軍詰禁而已司馬之屬與諸官聯事者三制畿封國地官冬官之事而土

方氏形方氏與之聯施貢分職地官之事而職方氏
與之聯均守平則地官天官之事而司險掌固匡人
與之聯是也大司馬掌其事而他官存其法他官執
其總而大司馬與馬者二簡稽鄉民司馬主之而邦
國之比要則小司徒受之設儀辨位統於春官秋官
而惟大射大司馬合諸侯之耦是也至於建牧立監
大宰專職比小事大進賢興功則天子巡守考職所
以勸懲羣侯運動四海之操柄而皆列職於司馬何

也蓋不能四征不庭則威命不能服衆而恩禮亦不足以感人五官之典皆廢置於無用矣周之東遷以後是也周公作立政則曰其克詰爾戎兵以陟禹之迹周頌之般亦曰薄言振之莫不震疊與此經之義更相表裏乃聖人仁育義正運用天理之實心實事與後世之耀威而黷武者異矣

以九伐之灋正邦國

正義鄭氏康成曰諸侯有違王命則出兵以征伐之

所以正之也諸侯之於國如樹木之有根本是以言
伐云 賈氏公彥曰案下文九者唯賊賢害民稱伐
此總言伐者侵滅二者亦是伐之例其餘六者皆先
以兵加其境乃眚之壇之削之正之殘之杜之故皆
以伐言

馮弱犯寡則眚之

馮皮冰反
眚史梗反

正義鄭氏康成曰馮猶乘陵也言不字小而侵侮之
案眚病之也如貶其爵命薄其恩禮披其附庸之類

與削異野荒民散不能自治其國邑故削之馮弱犯寡必雄桀驕蹇之侯也病之使不能張則自戢矣辨正鄭氏鐸曰注以青爲猶人之青瘦引王霸記削地之說與下削之無異非也

賊賢害民則伐之

正義鄭氏康成曰春秋傳有鍾鼓曰伐

賈疏莊二十九年左傳

伐

者兵入其竟鳴鍾鼓以往所以聲其罪

暴內陵外則壇之

壇鄭讀作埤音善

正義鄭氏康成曰內謂其國外謂諸侯壇讀如同壇

之壇

賈疏除地曰壇書金滕三壇同壇

王霸記置之空壇之地蓋置

之空壇以出其君更立其次賢者

賈疏以不滅其國故知更立賢子弟

賈氏公彥曰暴內即上賊賢害民是也陵外即上

馮弱犯寡是也有一於此故止於伐之責之不奪其位此兼有其惡故壇之

野荒民散則削之

正義鄭氏康成曰荒蕪也田不治民不附削其地明

其不能有 賈氏公彥曰古者量地以制邑度地以
居民地邑民居必參相得無曠土無游民野荒民散
由政惡民並適彼樂國是其君不能有也故削之
負固不服則侵之

正義鄭氏康成曰負猶恃也固險可依以固者也不
服不事大也詩曰密人不共敢距大邦 王氏應電
曰無鍾鼓曰侵掩其不備既服即止

案王師自出則宜曰討曰伐侵者鄰敵相掩之辭也

深則采入其阻淺則掠其邊疆蓋負固者必險遠之
國若會同討伐而據險逆命必曠日而勦民故委之
方伯連帥使壤地鄰接之國俟閒而乘之出其不意
以聲王討即不能應時戡定而四鄰交侵王無宥命
勢窮力屈自不得不悔禍而服義矣不服如朝覲愆
期職貢不入之類注謂不事大國蓋亦謂不從大國
之服王事者

賊殺其親則正之

正義鄭氏康成曰正之者執而治其罪春秋僖二十

八年冬晉人執衛侯歸之于京師坐殺其弟叔武

存疑鄭氏康成曰王霸記正殺之也

賈疏正未必即
是殺但賊殺其

親罪尤重故王霸
記以正爲殺也

放弑其君則殘之

弑本又作殺同
音試石經作殺

正義鄭氏康成曰放逐也

賈疏放若魯季氏逐昭公
之類弑若魯慶父弑二君

齊崔杼弑
君之類

王氏應電曰殘若秋官掌戮辜之焚之

罪不容於死也

案賊殺其親罪有輕重用罰非一故統之曰正放弑其君則非徒殺之必裂其支體如齊人轅高渠彌之類故曰殘

犯令陵政則杜之

正義鄭氏康成曰令猶命也王霸記犯令者違命也陵政者輕政法不循也

案杜與壇相近而有輕重壇猶放也周公囚蔡叔於郭鄰以車七乘雖禁其出入而尚得以私屬自隨與

鄰里往來杜則限隔內外不得復與人通與獄城類矣所以杜其犯上作亂之萌也

外內亂鳥獸行則滅之

行下
孟反

正義鄭氏康成曰王霸記悖人倫外內亂無以異於禽獸不可親百姓則誅滅去之也曲禮夫唯禽獸無禮故父子聚麀 賈氏公彥曰外亂若齊襄公淫於魯桓公夫人文姜內亂若衛宣公上烝父妾下納子妻是也

案春秋於世子亦書弑其君則賊殺其親乃謂戕其
戚屬者雖正其罪誅止於身其子姓果賢猶可繼世
也滅則舍亂人之類殄其世嗣或先世有元德顯功
則存其宗社而建置族姓可也惡莫大於放弑其君
殘其身且瀦其宮則滅不待言矣

正月之吉始和布政于邦國都鄙乃縣政象之灋于象
魏使萬民觀政象挾日而斂之

縣音懸挾
子協反

正義賈氏公彥曰政謂上九灋九伐并下凡令賦以

下

乃以九畿之籍施邦國之政職

正義鄭氏康成曰畿猶限也籍其禮差之書 王氏

昭禹曰九畿又謂九服者畿言其有界畫服言其服
王事 黃氏度曰政職司馬政典所當奉行

案政職主軍旅會同田役所賦車徒之數而職方氏
所謂制其職各以其所能制其貢各以其所有者亦
存焉

方千里曰國畿其外方五百里曰侯畿又其外方五百里曰甸畿又其外方五百里曰男畿又其外方五百里曰采畿又其外方五百里曰衛畿又其外方五百里曰蠻畿又其外方五百里曰夷畿又其外方五百里曰鎮畿又其外方五百里曰蕃畿

正義鄭氏衆曰春秋傳天子一畿列國一同

賈疏襄公二十

五年左傳鄭子產對晉辭

詩殷頌邦畿千里維民所止

賈氏公

彥曰侯者候也爲天子伺候非常也甸者爲天子治

田以出賦貢男者任也任天子之職事采者采取美
物以共天子衛者爲天子衛守蠻者縻也以近夷狄
縻繫之以政教自此以上六服是中國之九州自此
以外是夷狄之諸侯此蠻服與大行人要服一也蠻
服又云要服見要束以文教也夷者以夷狄而得稱
也鎮者去中國稍遠理須鎮守蕃者以其最遠故得
蕃屏之稱此三服總號蕃國大行人九州之外謂之
蕃國世一見是也 鄭氏康成曰自王城以外五千

里爲界有分限者九

通諭王氏安石曰方千里曰畿則禹貢所謂甸服也
甸服面五百里則爲方千里矣其外侯畿甸畿禹貢
所謂侯服也又其外男畿采畿禹貢所謂綏服也又
其外衛畿蠻畿禹貢所謂要服也又其外夷畿鎮畿
禹貢所謂荒服也又其外蕃服在禹貢五服之外
存疑王氏昭禹曰自侯畿至衛畿謂之中國所謂疆
以周索也自蠻畿至蕃畿謂之四夷所謂疆以戎索

也

案左傳疆以戎索謂晉也

凡令賦以地與民制之上地食者參之二其民可用者家三人中地食者半其民可用者二家五人下地食者參之一其民可用者家二人

正義朱子曰賦兵也古者以田賦出兵故謂兵爲賦鄭氏衆曰上地謂肥美田也食者參之二假令一家有三頃歲種二頃休其一頃下地食者參之一田薄惡者所休多劉氏敞曰小司徒均土地稽人民

周知其可任之數凡起徒役毋過家一人以其餘爲
羨惟田與追胥竭作此言可用者家三人至二人正
竭作其羨於四時之田而以教之戰也伍兩卒旅師
軍家一人爲正兵六鄉六遂通十有五萬人爲十二
軍而羨卒在外都鄙之兵又在外大司馬則總其軍
律既習之以田獵又試之以追胥馳驟之而隊伍罔
差操縱之而進退用命爲其可以起六軍而行九伐
也則家選一人而精彊可獲矣由教之者衆而用之

者寡也聖人之精密蓋如此

案上地以下已見小司徒及遂人而覆舉之蓋畜衆者司徒而徵兵者司馬或略焉則可任與施舍之數不分明矣曰凡令賦見此職所言乃敝賦賦輿之賦與九賦異也所令蓋兼六服羣侯之軍賦其畿內軍賦大小司徒令之

大司徒職凡大軍旅大田役以旗致萬民而治其徒庶之政令小司

徒職會萬民之卒伍以起軍旅以井牧之法起軍賦

大司馬亦必聯事焉曰凡

則畿內鄉遂公邑家稍縣都以及侯國無異法可知

矣侯國制畿施職制地令賦已具于司徒而復列於
司馬者必司馬董正之然後疆場不犯而政令無壅
也其後召虎南征疆土是徹乃率由周公之典法耳
周官之法車輦馬牛兵器旗物民自具之有事征
伐則遣人委人共其道路之資糧別無所謂軍用自
康成以賦爲給軍用者胡氏安國遂謂田以出粟取
之農夫賦以出兵取之商賈雜稅遂爲亂國邪臣興
利者所假托皆說經者之誤也

中春教振旅司馬以旗致民平列陳如戰之陳

中音仲下同陳

直順反下同

正義鄭氏康成曰以旗者立旗期民於其下也兵者
守國之備孔子曰以不教民戰是謂棄之兵者凶事
不可空設因蒐狩而習之凡師出曰治兵入曰振旅
皆習戰也四時各教民以其一焉春習振旅兵入收
衆專於農

案春耕時也故云兵入收衆專於農此釋振字之義

平猶正也賈

氏公彥曰旗熊虎之旗爾雅出爲治兵尚威武也入

爲振旅反尊卑也反尊卑者出則壯者在前老弱在後入則壯者在後老弱在前 王氏應電曰以旗致民即大閱司馬建旗旗弊誅後至等事平列陳者即大閱陳車徒斬牲聽誓等事也

案春時方寒以教茷舍則難露宿治兵大閱更非其時惟教振旅爲宜平列陳謂在所立表之北中軍未鼓之前先平列之也平者畫一整齊之意

辨鼓鐸鐃鐃之用王執路鼓諸侯執賁鼓軍將執晉鼓

師帥執提旅帥執鼙卒長執鐃兩司馬執鐸公司馬執

鐃

鐃直角反鐃乃交反賁扶云反提徒兮反鼙並兮反

正義鄭氏康成曰鼓人職以路鼓鼓鬼享以賁鼓鼓

軍事以晉鼓鼓金奏以金鐃止鼓以金鐸通鼓以金

鐃節鼓杜子春云公司馬謂五人爲伍之司馬也某

謂王不執賁鼓者尚之於諸侯也伍長謂之公司馬

者雖卑同其號

賈疏以軍事主嚴

賈氏公彥曰三時各教

其一必春辨鼓鐸者鼓雷之類象仲春雷發聲也鼓

人六鼓四金各依所用今賁鼓鼓軍事外王執路鼓
軍將執晉鼓等並不依本用在軍兼用也 王氏昭
禹曰軍法自旅而上然後有旗以非旗不足以指麾
也自旅而上然後有鼓以非鼓不足以令衆也

案軍事用賁鼓而不使軍帥執之者天子九伐多用
方伯連帥之師故以賁鼓屬諸侯教以敵王所愾也
賁鼓既屬諸侯王當上一等則路鼓矣晉者進也聞
鼓聲而進聞金聲而退出師之律也以金奏之鼓屬

主將所以示師行之節制也自鼙以上皆鼓也鼓皆有跗以植於車左傳汰輶及鼓跗著於丁寧則鼓下有跗明矣路鼓鼓鼓疑未必如考工所言者之長且大但取其名制同耳以其過大則掩目過長則植之不固又帆風也鐃鐃鐃則步者可手執而車亦有之此鼓鐃鐃鐃之用四時皆同與三時互見耳唯行師而爲無鍾鼓曰侵者則不用之然亦備而不用非竟無也諸侯乃朝覲而適遇時田或巡守而從王會

獵者故與於菟獮近畿之國亦或因王田來會春秋傳衛取相之東土以會王之東菟是也

辨正賈氏公彥曰先鄭以提爲馬上鼓有曲木提蓋據當時已有單騎故舉以爲況其實周時乘車無輕騎法

案提亦建於車上豈以其鼓較小偏植之故名提與鐃以止進使卒長執之何也其聲可達於四兩也若旅帥以上執之則所轄廣而不可以遠聞矣鐸以通

鼓使兩司馬執之何也四表僅二百五十步六軍分左右而陳去中軍有甚遠者矣惟二十五人之長排列甚近鼓聲止而傳鐸則同時可以立達矣鐸以節鼓使公司馬執之何也以爲車行徒步之節必伍長執之乃便也以節車徒而鼓人職曰節鼓何也車徒既行鼓聲不絕其行之疾徐異則鳴鐸之節亦異如車徒皆行時鼓聲三而一鐸則車驟徒趨時鼓聲再而一鐸鳴鐸以爲鼓聲疏數之節故又以爲節鼓也

四金獨無鐸康成以爲用於樂而不用於軍也馬氏
貴與據國語鳴鐸于以爲軍行則用之或後世有異
與

以教坐作進退疾徐疏數之節

數疏屋反
又所學反

正義鄭氏康成曰習戰法 賈氏公彥曰下大閱禮

虞人萊所田之野中軍以鼙令鼓鼓人皆三鼓已下
有此坐作進退疾徐疏數之節彼大閱具言於此略
說亦有此坐作之灋也

案王氏應電謂旗居卒閒以分地遠則疏近則數非也既曰居卒閒則遠近合一疏則均疏數則均數矣且分地在出和門之後此教戰時尚未也豈前三表百步爲疏後表五十步爲數與

餘論李氏嘉會曰兵事以進退疾徐疏數之節爲本武王誓師不愆於六步七步乃止齊馬武侯八陳進皆進止皆止所以不可破也荀子云齊之技擊魏之武卒秦之銳士終不可以當桓文之節制者以此

遂以蒐田有司表貉誓民鼓遂圍禁火獒獻禽以祭社

蒐師優反貉莫
駕反獒平世反

正義鄭氏康成曰春田爲蒐表貉立表而貉祭也誓

民誓以犯田法之罰也誓曰無干車無自後射立旌

遂圍禁旌獒爭禽而不審者罰以假馬

賈疏此據漢
田律而言無

干車謂無干犯他車無自後射象戰
陳不逐奔走假馬謂獲禽所算之籌

禁者虞衡守禽

之厲禁也既誓令鼓而圍之遂蒐田火獒火止也春
田主用火因焚萊除陳草皆殺而火止獻猶致也屬

也田止虞人植旌衆皆獻其所獲禽焉詩云言私其
縱獻豸于公春田主祭社者土方施生也 賈氏公
彥曰蒐搜也春時鳥獸字乳搜取不孕者故以蒐爲
名此亦當如大閱禮以旌爲左右和之門羣吏各帥
其車徒以叙和出左右陳車徒有司平之既陳設驅
逆之車而後有司表貉不言文略也 鄭氏衆曰貉
讀爲禡禡師祭也書亦或爲禡

案誓當有二前誓在列陳之後戒其坐作進退之不

用命中冬所云是也後誓在表貉之後戒其從禽之
不如法此云誓民是也經文蓋互見爾疏引大閱羣
吏聽誓以當此似未明析

辨正鄭氏鐸曰肆師大田獵祭表貉則爲位甸祝掌
四時之田表貉之祝號則有司謂肆師與甸祝也注
以大司徒爲有司非也

存疑鄭氏鐸曰月令仲春之月毋焚山林司馬乃用
火田蓋春所焚止禁圍以內爲地無多耳

案春蒐火獒蓋尚在未啓蟄時

中夏教芟舍如振旅之陳

芟蒲未反

正義鄭氏康成曰芟讀如萊沛之沛

賈疏俗以水草爲萊沛

芟

舍草止也軍有草止之法

賈疏以草釋芟以止釋舍

王氏志長

曰芟舍謂草宿也營壘於野所戒在夜故教之

羣吏撰車徒讀書契辨號名之用帥以門名縣鄙各以

其名家以號名鄉以州名野以邑名百官各象其事以

辨軍之夜事其他皆如振旅

撰息轉反注讀作莫又助轉反

正義鄭氏康成曰撰讀曰算算車徒謂數擇之也讀

書契以簿書校錄軍實之凡要

賈疏軍實兵器也

號名者徵

識所以相別也鄉遂之屬謂之名

賈疏即經云縣鄙是遂之屬州是鄉

之屬野以邑名亦在焉

家之屬謂之號

賈疏謂都家之大夫至士

百官之屬

謂之事

賈疏從王朝六卿以下至下士

在國以表朝位

賈疏親禮上介各奉其君

之旂置于官是也

在軍象其制而爲之以備死事

賈疏綴之於膊上以

別死者

帥謂軍將以門名者所被徽識如其在門所樹

者也軍將皆命卿古者軍將蓋爲營治於國門魯有

東門襄仲宋有桐門右師皆上卿爲軍將者也

賈疏非常

之急要在於門使卿爲軍將居國門故帥以門名

縣鄙謂縣正鄙師至鄰長

也家謂食采地者之臣也

賈疏食采是公卿大夫身在朝其臣在其采地今隨

主在軍故以家號爲名

鄉以州名亦謂州長至比長也野謂公

邑大夫

賈疏謂四等公邑

百官以其職從王者此六者皆書

其官與名氏焉

賈疏假令官則云大司徒下某官姓名某

夜事戒夜守之

事草止者慎於夜於是主別其部職

賈疏分別其當部當職不交雜

鄭氏鍔曰鄉之軍法至州而成故以其州名之言

某州之師也

案行軍有晝事必有夜事皆所當習夏月暑熱薰蒸從禽之役不可以終日故芟舍則專以辨軍之夜事於以順時令而適人情斯爲宜矣然則芟舍蓋晚集而曉散者也自撰車徒至車弊蓋終夜及晨而畢之撰車徒讀書契案籍而數之即各以所建所執之器爲驗也他時亦然特於此見之耳羣吏分爲之則不疾而速矣辨號名之用夜事之所尤重也故下文詳

言之帥以門名者孤卿爲主帥者也一帥所統之軍或由鄉或由遂或由采地或由公邑鄉師遂人縣師稍人諸官以灋作民徒帥而至於司馬以分隸於六軍之帥既更番而遞役之以均其勞逸又隨所部而分轄之使親其長上故一帥之下有此數色也縣鄙由六遂來者家由采地來者即師都也鄉由六鄉來者即州里也野由公邑來者也官府者孤卿大夫士之總稱孤卿既爲主帥則此百官者大夫士也縣鄙

各以其名如云某遂某縣某鄙也鄉以州名如云某鄉某州某黨也野以邑名若魯則武城汶上之等是也此三者注云鄉遂之屬謂之名即司常職州里各象其名者也家以號名如孟孫氏叔孫氏臧氏邱氏之等皆號也注云家之屬謂之號即司常職家各象其號者也百官各象其事如天官之幕人掌次地官之鼓人牛人山虞澤虞春官之甸祝夏官之量人小子司弓矢之屬其從王者則師氏保氏虎賁大僕之

等皆於伍兩卒旅之外各有所司其爵則大夫士故
目之曰百官書其官則事具矣注云百官之屬謂之
事即司常職官府各象其事者也夏茂舍冬大閱如
此他時號名亦同可知夜戰聲相聞爲其素所稔也
號名定則一呼立應運掉自靈即有死綏者而亦不
虞其無所識別矣此不言王與諸侯者號名之所不
及也

遂以苗田如蒐之灋車樊獻禽以享禘

禘餘
若反

正義王氏昭禹曰夏田爲苗除禽獸之害故曰苗

鄭氏康成曰車樊驅獸之車止也夏田主用車示所

取物希皆殺而車止

賈疏隱九年左傳彼徒我車懼其侵軼我也是車行遲取獸少

案冬狩徒樊非不用車則夏苗車樊亦非不用徒各存所主車樊而徒亦止殺耳王制天子

殺則下大綏諸侯殺則下小綏大夫殺則止佐車佐車止則百姓田獵祔宗廟之夏祭也

案號名既辨則表貉圍禁即於其夜及晨畢之亦所以習宵戰也蓋仲夏日炎使將士被甲荷戈馳驟窮

日則人怠馬煩而軍容爲之不肅矣故教以芟舍而
苗以車樊取物甚希禮成而人不勞事舉而時不費
凡此皆聖人以仁體事所以曲成乎萬物也 舊說
禴祠烝嘗皆以孟月然中夏苗田獻禽以享禘中冬
狩田獻禽以享烝据此則當以中月蓋古者祭必卜
日吉事先近如孟月不吉則至中月矣中月可祭則
孟月亦可田中春中夏經特言其概耳非膠執者也
惟君用鮮故時田爲致享而設禮七鼎七俎者用

乾腊九鼎九俎者則有鮮腊是也鮮獸而以腊用之者田後尚有散齊致齊之期非腊不可耳九鼎有鮮魚先期獻人亦取魚可知

中秋教治兵如振旅之陳

正義賈氏公彥曰出曰治兵入曰振旅春以入兵爲名尚農事秋以出兵爲名秋嚴尚威故也

辨旗物之用王載大常諸侯載旂軍吏載旗師都載旌鄉遂載物郊野載旒百官載旗各書其事與其號焉其

他皆如振旅

書如字

正義鄭氏康成曰軍吏軍帥也野謂公邑大夫賈氏公彥曰各書其事與其號即仲夏百官各象其事及號名之等秋雖不主辨號名亦略舉之見四時皆有此物也

案司常職云大閱頒旗物此云治兵辨旗物則是大閱與治兵之旗物固自不同兩經各言其一而中冬大閱之旗物即於司常見之矣唯王建大常諸侯建

旂彼此無異彼云孤卿建旌大夫士建物師都建旗
州里建旗縣鄙建旄孤卿即此軍吏也以其爵則曰
孤卿爲主帥則曰軍吏大夫士即此百官也以其爵
曰大夫士以其從王有事而不與乎圍禁如師氏保
氏甸祝量人之屬故曰百官也師都即此師都謂車
徒自公孤卿大夫之采地來者也州里則此之鄉也
縣鄙則此之遂也彼不見公邑蓋於縣鄙內包之此
云郊野則公邑也遂人掌邦之野野以六遂兼公邑

足以明之郊外曰野故連言郊也鄉遂郊野謂車徒之從鄉遂公邑來者凡此皆分隸於六軍之軍吏故載旌載物載旒也此所載與大閱異者軍灋之變也蓋行軍有正灋有變灋大閱之旗物正灋也治兵之旗物變灋也正灋以齊軍心變灋以新師目故孤卿之建旌者改而載旗師都之建旗者改而載旌采地本屬孤卿不妨於互易也州里建旗縣鄙建旒並改而載物而郊野則別載旒彼以鄉遂區內外此則以

鄉遂與郊野別公私也百官雖不與圍禁必有所載以爲別百官載旗則鄉遂不得不合而載物矣鄉遂自州長縣正以下亦大夫士也載物載旒載旗爵列相等故可易也治兵旗物可變則振旅芟舍及行軍時皆有變灋可推春秋時有不去其旗而敗者有望其旗而指目其仇者有納旌於弣中不令敵人見者此旗物所以有變易之灋與

存疑鄭氏康成曰師都遂大夫也鄉遂鄉大夫也或

載旛或載物衆屬軍吏無所將也郊謂鄉遂之州長縣正以下也百官卿大夫也載旗者以其屬衛王也凡旌旗有軍旅者畫異物無者帛而已書當爲畫事也號也皆畫以雲氣

案司常注以師都爲鄉遂大夫而此以爲遂大夫經明言鄉遂而以爲鄉大夫匪唯違經抑且自背又以郊爲州長縣正以下亦屬不倫良由未得其條理而隨文立解故此注既與司常互異而亦與笈舍齟齬

也。旌物則旌貴於物，旗旃旒則旗貴於旃與旒。故秋冬雖變易而皆不失其倫，不畫異物之旌物。師都鄉遂之臨行，陳者亦載之，畫鳥隼之旃，百官之不臨行，陳者亦載之，如泥注義則師都鄉遂一無所將所司何事而祭祀會同王之載常，諸侯之載旗自若也。豈必有所將而後畫日月交龍乎？雲氣之畫尤屬無稽。司常以畫爲書，此忽以書爲畫，胡反覆不定邪？

遂以獬廌田如蒐田之灋，羅罃致禽以祀祊。

獬廌淺反
祊音方

正義鄭氏康成曰秋田爲獮獮殺也

鄭氏鍔曰秋氣肅殺故田以殺

爲主羅弊罔止也秋田主用罔中殺者多也皆殺而罔

止祊當爲方聲之誤也秋田主祭四方報成萬物詩

曰以社以方

賈疏祊乃是廟門內之祭今因秋田而祭當是祭四方之神引詩證方是四方

案四方之神蓋祀所獮之方而爲道之所經者變

文曰致禽以物成而獲多故屬而比之然後取其上

殺以獻也於秋冬曰致禽則春夏獻禽之約可知矣

中冬教大閱前期羣吏戒衆庶脩戰灋

正義鄭氏康成曰春辨鼓鐸夏辨號名秋辨旗物至

冬大閱簡軍實

賈疏以冬時農隙故大簡閱軍實之凡要見春夏秋各教其一至冬總教

之羣吏鄉師以下

賈疏鄉師職凡四時之田前期出田法於州里簡其鼓鐸旗物兵器

脩其卒伍是其事也以下若州長師田行役帥而致之掌其戒令黨正則以法治其政事族師則合其卒伍簡其兵器以鼓鐸旗物帥而至是也

案田法戰法之詳至仲冬始見者必待築場納稼之後乃可徧簡車徒稽人畜旗物軍器也行於三時則奪農功而無地以陳車馬矣

虞人萊所田之野爲表百步則一爲三表又五十步爲一表田之日司馬建旗于後表之中羣吏以旗物鼓鐸蠲饒各帥其民而致質明弊旗誅後至者

正義鄭氏衆曰虞人萊所田之野芟除其草萊令車得驅馳 鄭氏康成曰萊芟除可陳之處後表之中

五十步表之中央表所以識正行列也

賈疏於可陳之中央立此

四表軍至表則閒一而坐坐而更起是表正行列也

四表積二百五十步左右

之廣當容三軍步數未聞致致之司馬質正也弊仆

也 賈氏公彥曰三表之立始於南以北爲後表
王氏昭禹曰軍法後期者斬而此言誅則方致民也
以下文言不用命斬則此言誅未遽以死處之也

乃陳車徒如戰之陳皆坐羣吏聽誓于陳前斬牲以左

右徇陳曰不用命者斬之

乃陳之陳如字

正義鄭氏康成曰皆坐當聽誓羣吏諸軍帥也

案衆軍帥

蓋自師帥以下

陳前南面鄉表也月令季秋天子教于田獵

以習五戎司徒搢扑北面以誓之

賈疏軍吏及士本是六鄉之民故使

司徒誓之此大閱禮實正歲之中冬而言季秋之政爲周

之中冬月令失之

賈疏周雖建子及其行事皆用夏之正歲此經中春中夏中秋中冬

皆據夏正也呂不韋作月令以爲周之中冬當夏之季秋故言失之斬牲者小子也賈疏

小子職凡師田斬牲以左右徇陳凡誓之大略甘誓湯誓之屬是也

賈氏公彥曰士卒皆於後表北面坐諸軍帥皆在

士卒前南面立以聽誓徇陳從表左右向外以徇陳

案車徒當陳於後表之北記曰司徒搢扑北面誓之

惟陳於後表之北故誓必北面誓畢然後司馬南面

令鼓而車徒以次而前也然則建旗于後表之中者
蓋當後表之北而建之以其與表相當故云中而
表北之地必可以容六軍可見矣士師五戒首軍
旅之誓則發誓命時士師宜泣焉春蒐之禮有司表
禡誓民表禡者肆師士師掌田役之禁則誓民者必
士師矣若斬牲以左右徇陳乃師田之所同則共其
事者小子也

中軍以鼙令鼓鼓人皆三鼓司馬振鐸羣吏作旗車徒

皆作鼓行鳴鐃車徒皆行及表乃止三鼓撫鐃羣吏樊

旗車徒皆坐

撫音鹿李蒲表反

正義鄭氏康成曰中軍中軍之將也天子六軍三三

而居一偏羣吏既聽誓各復其部曲中軍之將令鼓

鼓以作士氣也

賈疏莊十年左傳曹劌曰一鼓作氣再而衰三而竭是也成二年晉與齊

戰于鞏卻克援抱而鼓之哀二年鐵之戰趙
簡子云吾伏弋嘔血鼓音不衰皆將居鼓下

鼓人者

中軍之將師帥旅帥也

賈疏上經軍將執晉鼓師帥執提旅帥執鼙皆鼓人

司

馬兩司馬也振鐸以作衆作起也既起鼓人擊鼓以

行之伍長鳴鐃以節之

賈疏鼓人職以金鐃節鼓

伍長一曰公司

馬及表自後表前至第二表也三鼓者鼓人也撫讀

如涿鹿之鹿掩上振之爲撫

賈疏以手在上掩而執之

撫者止

行息氣也

賈疏鼓人職以金鐃通鼓而云止行息氣者撫鐃即樊旗故知止行息氣也

司

馬法曰鼓聲不過閭鼙聲不過闌鐃聲不過琅賈

氏公彥曰此聽誓訖將向南第二表象戰陳初發面

敵也

案六軍三三而居一偏則中軍亦在矣王親田則王

自爲中軍而孤卿將其五王不與則中軍亦孤卿也
其六軍之帥宜各閱其屬每軍各立四表如中軍之
式師都鄉遂公邑諸帥各帥其屬分隸六軍分班鱗
次而進中軍不徧閱也蓋古者兵車一乘徒七十五
人而大閱之表相去僅百步必如牆而進始能驟趨
馳走及表而止歸於截然齊一六軍車徒極多雖各
閱其屬猶恐不及況以中軍徧閱六軍乎以鼙令鼓
令六軍之鼓也令之者中軍之旅帥也則六軍之各

自爲表可見矣大僕職凡軍旅田役贊王鼓則王與而自爲一軍又可知矣

又三鼓振鐸作旗車徒皆作鼓進鳴鐃車驟徒趨及表乃止坐作如初

正義鄭氏康成曰趨者赴敵尚疾之漸也春秋傳先人有奪人之心

賈疏昭二十一年左傳

及表自第二前至第三

乃鼓車馳徒走及表乃止

正義鄭氏康成曰及表自第三前至前表王氏應

電曰車驟徒趨象以漸赴敵也車馳徒走對敵行益疾也

鼓戒三闕車三發徒三刺

闕苦穴反
刺千賜反

正義鄭氏康成曰鼓戒戒攻敵鼓壹闕車壹轉徒壹刺三而止象服敵

案注以車轉爲發恐不然車既及表乃止矣又三轉胡爲乎蓋車上

主射者三發天
以象殺敵耳

王氏昭禹曰戒者作氣使戰闕者

不極其力

案羣吏致民於後表之中陳而皆坐尚未行也故至

第一表曰車徒皆行由第一表至第二表象師之進故曰鼓進由第二表至第三表則極矣象代國之附其城對敵之薄其陳故車發徒刺而鼓退也凡此坐作進退發刺之節四時所同而獨於大閱言之者民事至冬而畢然後車徒可詳簡也

乃鼓退鳴鐃且卻及表乃止坐作如初

卻起略反

正義鄭氏康成曰鐃所以止鼓軍退卒長鳴鐃以和衆鼓人爲止之也

賈疏鼓人職以金鐃止鼓

退自前表至後表鼓

鐸則同習戰之禮出入一也異者廢鐸而鳴鐃賈
氏公彥曰乃鼓退者謂至南表軍吏及士卒回身向
北更從南爲始也鳴鐃且卻者據初至南表退軍之
時象在軍軍退亦鳴鐃哀十一年左傳艾陵之戰陳
書云吾聞鼓不聞金亦是鳴鐃退軍法

案大閱事畢則鳴鐃而卻可矣復鼓之而後退何也
鼓以作氣兵事以嚴終故復鼓以示氣無衰竭耳
遂以狩田以旌爲左右和之門羣吏各帥其車徒以敘

和出左右

正義鄭氏康成曰冬田爲狩軍門曰和今謂之壘門

立兩旌以爲之

賈疏昭八年秋蒐于紅穀梁傳刈蘭以爲防置彊以爲轅門以葛覆質以

爲檠流旁握御擊者不得入注云質榘也檠門中泉也流旁握謂陣兩轆頭各去門邊容握握四寸也又車攻詩傳云大芟草以爲防或舍其中褐纏旃以爲門裹纏質以爲檠門容握驅而入擊則不得入左者

之左右者之右然後焚而射焉叙和出用次第出和門也左右或出

而左或出而右鄭氏鍔曰軍中用轅爲門此乃用

旌爲和門何也軍行偶有所止以車爲藩則仰轅以

爲門田而教戰欲使衆心和一也故設爲和門

案植旌爲門不以轅者凡車皆行不得止之以爲門也
以敘和出以次第出左右兩和門既使車徒行列
整齊亦以試御者過君表之法也

陳車徒有司平之旗居卒間以分地前後有屯百步有

司巡其前後險野人爲主易野車爲主

易俞寄反

正義鄭氏康成曰有司平之鄉師居門正其出入之

行列也

賈疏鄉師職巡其前後之屯而戮其犯命者斷其爭禽之訟故知此經有司皆是鄉師

旗謂軍吏所載分地調其部曲疏數前後有屯百步

車徒異羣也

賈疏出軍之時一車甲士三人步卒七十二人車徒同羣今在軍行列之時則

車徒異羣也

車徒畢出和門鄉師又巡其行陳

賈氏公

彥曰旗居卒間者軍吏各領己之士卒執旗以表之

鄭氏衆曰險野人爲主人居前易野車爲主車居

前

陳氏祥道曰春秋左傳周伐鄭鄭爲魚麗之陳先偏後伍伍承彌縫偏則車也伍二十五人伍從其

偏也先其車足以當敵後其人足以待變古車戰之法略可知也

案車徒既出門而趨圍地則左右陳之有司平其行

列每百人爲卒則植旗其間以分所占之地必廣狹
如一禁地之前後各有屯百步以待田畢屯車徒而
後各獻其所獲也險野人爲主謂列陳用徒而以車
承其闕也險則高下偏仄車不可行其間平地乃以車承其闕易野車爲主謂
列陳用車而以徒承其闕也

既陳乃設驅逆之車有司表貉于陳前

正義鄭氏康成曰驅驅出禽獸使趨田者也逆逆要

不得令走設此車者田僕也

賈疏田僕職設驅逆之車王氏昭禹曰驅逆

之車校人
帥之以至

中軍以鼙令鼓鼓人皆三鼓羣司馬振鐸車徒皆作遂
鼓行徒銜枚而進大獸公之小禽私之獲者取左耳

正義鄭氏康成曰羣司馬謂兩司馬也

賈疏上文春
辨鼓鐸云兩

司馬
振鐸

枚如箸銜之有繮結項中

賈疏繮即兩頭繫也
既有兩繫明於項後

中央
結之

軍法止語爲相疑惑也進行也獲得也得禽獸

者取左耳當以計功 鄭氏衆曰大獸公之輸之於

公小禽私之以自畀也詩公言私其縱獻斚于公

王氏應電曰獲者取左耳如軍法之執馘

案上經曰司馬振鐸此曰羣司馬者併六軍而趨圍禁衆鐸齊鳴非加羣字不足以顯此義也

及所弊鼓皆駮車徒皆譟徒乃弊致禽饁獸于郊入獻

禽以享烝

駮本亦作駮胡楷反
譟素報反饁移獵反

正義鄭氏康成曰鄭司農云及所弊至所弊之處某

謂所弊之處田所當止也天子諸侯蒐狩有常至其常處吏士鼓譟象攻敵尅勝而喜也疾雷擊鼓曰駮

譟謹也書傳曰前師乃鼓鼗譟亦謂喜也徒乃樊徒止也冬田主用衆物多衆得取也致禽饁獸于郊聚所獲禽因以祭四方神於郊月令季秋天子既田命主祠祭禽四方是也入又以禽祭宗廟易氏祓曰春社夏杓秋枋不言入獻禽而冬烝獨言入者以外行致禽饁郊之禮然後入獻於宗廟也鄭氏鶚曰郊言饁獸烝言獻禽合而言之獸亦曰禽也

案車徒皆行獨言徒樊者車至所止之地則排列不

行徒猶進而逐獸終事而後徒弊也戰法田法春舉其綱冬詳其目大閱司馬建旗於後表之中至不用命者斬之即春蒐以旗致民平列陳如戰之陳也中軍以鼙令鼓至鳴饒且卻坐作如初即春蒐所教坐作進退疾徐疏數之節也以旌爲左右和之門至車徒皆譟即春蒐表貉誓民鼓遂圍禁也前期修戰法乃四時所同而於冬乃出之則三時專辨其一而大閱備舉其全具見矣先王寓兵於農正羨之卒必

無一人不教然後本強而精神可以折衝事習而此
戶皆能守禦又必歲時從其有司先肄試焉然後居
常自厲而無怠心公邑都家之民分四時更番以從
蒐狩數歲而徧未見其煩擾也經文號名旗鼓備列
縣置地官又曰惟田與追胥竭作而陳氏汲乃云司
馬所教惟鄉遂餘皆不與謬矣狩田徒獫正與火獫
車獫羅獫相對而王氏應電乃云冬亦兼用火羅皆
昧事理悖經義故略舉一二以見義例焉

餘論胡氏安國曰戎祀國之大事也用民以訓軍旅示之以武取物以致祭享示之以順也然不時則害農不地則害物春夏秋冬之仲皆常時也周甫田鄭原圃秦具囿之屬皆常所也若違害民物則百姓將聞車馬之音見羽旄之美而疾首蹙頰可不謹乎

總論王氏應電曰昆蟲未蟄不以火田春而火止故以火言鳩化爲鷹然後設罽羅故以羅言四時皆有宗廟之祭夏禴以迎來冬烝以送往錯舉其盛者也

李氏曰鳥獸魚鼈皆函血氣若無故而殺之是暴
天物作禽荒也故因祭社享禘祀祫享烝而行焉
及師大合軍以行禁令以救無辜伐有罪

正義鄭氏鐸曰行禁令所以申明九法也 鄭氏康
成曰師所謂王巡守若會同司馬起師合軍以從所
以威天下行其政也

案下特舉大師則此云師者司馬奉王命以征伐亦
存焉行禁令因伐有罪而明王禁於羣侯也

若大師則掌其戒令泣大卜帥執事泣釁主及軍器

正義鄭氏康成曰大師王出征伐也泣臨也臨大卜

卜出兵吉凶也

賈疏大卜掌龜之八命一曰征

司馬法曰上下下謀

是謂參之

賈疏卜在廟故云上卜謀在下故云下謀君居其中故云參也

主謂遷廟

之主及社主也軍器鼓鐸之屬凡師既受甲迎主於

廟及社主祝奉以從殺牲以血塗主及軍器皆神之

易氏祓曰天子親征方伯連帥各以師從軍將師

帥莫不受戒令於大司馬

賈氏公彥曰小子職釁

邦器及軍器彼釁之大司馬主臨之

及致建大常比軍衆誅後至者

比必里反

正義鄭氏衆曰致謂聚衆也 鄭氏康成曰比校次

之也 賈氏公彥曰大師王親御六軍故司馬用王

之大常致衆若王不親則司馬自用大旗致之 王

氏安石曰鄉師致民以司徒之大旗則司馬致民宜

以王之大常矣凡此皆示其致民之命有所受之也

案稍人帥衆而致於大司馬王親征則邦國亦以師

從凡帥衆而至者大司馬皆以致於王故建大常注
謂致民者鄉師非也役則鄉師致之軍事則正治其
徒役戮其犯命者而不致也

及戰巡陳眡事而賞罰

正義鄭氏康成曰事謂戰功也

案觀此則大司馬不任軍帥而兼督六軍吏士春秋
傳晉軍帥及佐之外別立司馬蓋其遺法

若師有功則左執律右秉鉞以先愷樂獻于社

鉞音越
先慈薦

反

正義鄭氏康成曰功勝也先猶道也律所以聽軍聲

賈疏律以聽軍聲大師職文初出軍時大師執聽至此尅勝司馬執之

鉞所以爲將威

也兵樂曰愷獻于社獻功於社也司馬法得意則愷樂愷歌示喜也鄭司農曰故城濮之戰春秋傳振旅

愷以入於晉

賈疏僖二十八年左傳

案六軍之帥必各帥其屬以振旅而司馬獨先亦不爲軍帥之徵

若師不功則厭而奉主車

厭於業反

正義鄭氏康成曰鄭司農云厭謂厭冠喪服也軍敗

則以喪禮故秦伯敗於殽素服郊次鄉師而哭

賈疏倍三

十三年左傳

某謂厭伏冠也

賈疏曲禮厭冠不入公門五服之冠皆厭

奉猶送

也送主歸於廟與社

王弼勞士庶子則相

勞力報反相息亮反

正義鄭氏康成曰師敗王親弔士庶子之死者勞其

傷者則相王之禮庶子卿大夫之子從軍者鄭氏

鐸曰士庶子宿衛王宮者

案兵凶戰危故雖王師九伐必具死敗之禮獻而奉主車及相弔勞皆使大司馬親之俾無事則職思其憂消患於未形有事則謀出萬全也雖師有功將士必有死傷士庶子之弔勞王猶親之則每上者不必言矣

大役與慮事屬其植受其要以待攷而賞誅

與音預屬音燭植除

吏反

正義鄭氏康成曰大役築城邑也慮事者封人也於

有役司馬與之

賈疏宣十一年左傳楚令尹蔦艾獵城沂使封人慮事以授司徒案楚

使封人偶然之事末可以爲定職王朝大役慮事者其司空與鄉師職以攷司空之辟

桓築城

楨也

易氏板曰楨謂築城板幹制度之高博係馬案楨蓋與楨通築牆版木孔氏安國曰題曰楨

當牆端者也旁曰幹在牆兩邊者也

屬賦丈尺與其用人數鄭氏衆

曰國有大役大司馬與謀慮其事也要者簿書也攷

謂攷校其功

存疑鄭氏衆曰楨謂部曲將吏春秋傳宋城華元爲

植巡功

賈疏宣二年左傳

屬謂聚會之也

辨正賈氏公彥曰先鄭以植爲部曲將吏屬爲會聚後鄭不從者案昭三十二年晉士彌牟營成周今役於諸侯屬役賦丈以此知屬謂賦丈尺與人數也王氏安石曰與慮事欲知其故之可否屬其植欲知其人之多寡受其要欲知其功之差等

通論王氏應電曰大役任衆屬軍禮故主其事者司空也大司馬與其謀賦之丈尺者量人也大司馬主

其數執其要簿而考之者鄉師也大司馬行其誅賞大會同則帥士庶子而掌其政令

正義鄭氏康成曰帥帥以從王

賈疏諸子職若會同賓客作羣子從是也

鄭氏鍔曰士庶子掌於官伯其職曰邦有大事作官衆則令之令者作而行之必須有統率之人以政令治之故屬於司馬

若大射則合諸侯之六耦

正義鄭氏康成曰大射王將祭射於射宮以選賢也

賈疏射義古者諸侯歲獻貢士于天子天子試之于射宮中多者得與于祭大射禮亦射于郊學宮中皆是爲祭
王射三侯以諸侯爲六耦賈疏王射三侯者司表職王大射則
共虎侯熊侯
豹侯是也

存疑賈氏公彥曰大射用諸侯爲六耦若賓射射人亦用六耦但不用諸侯當以卿大夫爲之燕射三耦自然用卿大夫以下

案大射未必如注疏所云說見天官司表職及儀禮大射儀大射以諸侯爲六耦當是正射之耦非初射

之耦也疏以燕射三耦例之是直以爲初射之耦矣
諸侯大射以弟子爲三耦以初射故使賤者也豈諸
侯而可使爲初射之耦乎但耦數以六爲限其故未
詳大射儀公與賓爲耦卿大夫繼之無定數與此異
又若諸侯不足則當以大夫耦之諸侯爲下射大夫
爲上射以大射儀士與大夫爲耦推之可知蓋每耦
有一諸侯即爲諸侯之耦不必十二諸侯而始備也
王與射亦當與諸侯爲耦

大祭祀饗食羞牲魚授其祭

正義鄭氏康成曰牲魚魚牲也祭謂尸賓所以祭也

賈疏少牢賓尸禮尸俎五魚侑主人主婦各一魚加膳祭於其上公食大夫禮亦云授賓祭若王祭則膳之夫授

案大司馬羞牲魚者以羊肆羊殽小子羞之故大司馬無其文也凡牲牛爲大大司徒羞之魚腊魚爲貴大司馬羞之皆舉其重者而其餘則從殺不必正卿矣經云授其祭唯魚有之明他牲之不然也又此與

饗食並列意繹祭賓尸之所羞故有此授與

大喪平士大夫

正義鄭氏康成曰平者正其職與其位

辨正賈氏公彥曰先鄭以平爲一其服後鄭不從者
小宗伯已縣衰冠故也

喪祭奉詔馬牲

正義鄭氏康成曰王喪之以馬祭者蓋遣奠也

賈疏
喪奠

及虞卒哭無奉送詔告惟大奉猶送也送之至墓告
遣奠入壙之時有奉送之事

而藏之

案遺奠入壙者卽士喪禮所云苞牲取下體者也檀弓云國君五个大夫七个其牲體之數也常祭用牛止矣此獨有馬牲者盛葬奠也

小司馬之職掌

正義鄭氏康成曰此下字脫滅札爛文闕漢興求之不得遂無識其數者

案小司馬職闕以諸官例之所專掌必論辨官材也

蓋師之職皆以貳其正然必有專掌之事爲正之所不能兼者如小宰之建宮刑小司徒之建教法小宗伯之建神位小司寇之掌大訊是也國子選俊並升於司馬司士治之庶子之脩業於鄉學者諸子治之而大司馬職不及論辨官材則小司馬專之必矣凡小祭祀會同饗射師田喪紀掌其事如大司馬之灋正義賈氏公彥曰小祭祀已下至喪紀皆蒙此小字對大司馬大祭祀之類

軍司馬

闕

輿司馬

闕

行司馬

闕

正義賈氏公彥曰軍司馬當宰夫肆師等職皆下大夫四人輿司馬當上士八人行司馬當中士十六人餘官皆無異稱此獨有之者以軍事重故特生別名也

欽定周官義疏卷二十九



覆校官庶吉士臣茅元銘
校對官編修臣朱依魯

謄錄貢生臣張寧